

Dading Cunh:

Aeu Duk Gaeu Rong Nywj San Saedcej Diemzvan

大定村村民变废为宝编织甜蜜生活

□ Ning Gozyung

Daj gizgyae yawj daengxmbanj.



▲ Hekyouz humx cawx doxgaij dajsan.



▲ Ndaw mbanj nanz mbouj nanz cujcz guh doxdax dajsan.



▲ Mehmbwk dajsan da raeh fwngz riengj.



▲ Mehmbwk youq ndaw dah swiq gogaeu dak hawq guh dajsan.

“Gogaeu maj rim bo, hohhoh san canh cienz; dinfwngz daihdaih cienz, gai ok biengz ok guk.” Hot fwen sepset haprwenz neix, eu ok gij saedcej vuenyungz vunzmbanj Dading Cunh Disuh Cin Duh’ anh Yauzcuz Swciyen.

Dading Cunh dieg youq baihsae Disuh Cin, liz yienhsingz Duh’ anh 13 goengleix gyae, dieg gyaeundeiz vunz gvaigvet. Daengx cunh miz 1085 ranz 4611 vunz, reihnaz moix vunz bingzyaenz mbouj daengz 0.7 moux, gaxgonq dwg aen cunh gungzhoj ndeu. Bi 1998 gvaqdaeuj, vih cauxlaeb aen cunh guhyienh siuj-gangh vwnzmingz Hozciz Si, dangcijhu aen cunh neix baengh gij ndeindiq vunzmbanj rox dajsan, sonyinx vunzmbanj aeu aen fuengsik “gunghsw + nungzhoh” haenqrengz hwnghat faexcuk gogaeu go’em gunghyibinj daegsaek canjyez, gunghsw bau ra dinghdan, roen siugai, laeb dieggoek dajsan, vunzmbanj couh ciep mbawdan youq ranz ciuq yienghdoz mbawdan dajsan, ranzranz ngoenzngoenz cungj guh ndaej nyaengqnyinyi, doxgaij san okdaeuj le gyau hawj gunghsw gai okbae, demlai souhaeuj. Seizneix, ndaw mbanj gij doxgaij dajsan cix daj gaxgonq cij dan miz doxgaij duk

san hwnghat daengz gogaeu, go’ nywj, diuzfaex, mbaw, nyangj, naeng, ganj, rong go’ gvang daengj dinfwngz doxcab dajsan, nyumx saek haenx gungh 300 lai dauq 1500 lai cungj doxgaij, gij doxgaij san okdaeuj haenx caizliu daegbied, yienghsik moqsup, ndeiawj saedyungz, caet-liengh ndei gyaqcienz cienh, ndaej daengz gyoengq canghhek ndaw guk rog guk haengjgyaez, doxgaij gai daengx daengx guk gak aen hawsingz hung, caiqlij gai daengz Meijgoz, Fazgoz, Yizbwnj, Yinghgoz, Hozlanz, Gyahnazda, Bijlisiz, Audaliya daengj 20 aen gukgya dem, mingzdaeuz ndei riuz doh gwnzhaw ndaw guk rog guk, baenz le “Aenmbanj doxgaij faexcuk gogaeu go’em dajsan daengx guk”. Bi 2011, Swcigih dingh Dading Cunh guh buk daih’ it “Aencunh mizmingz daegsaek yiengh gungh-mou”, doengz bi aeundaej aen mingzdaeuz ndei aencunh vwnzmingz daengx guk.

Dading Cunh daj ciuhgeq couh cienz roengz dinfwngz aeu faexcuk gogaeu dajsan, doengh bi neix daeuj, aen cunh neix giethab hwnjguh aencunh mizmingz daegsaek gungh-mou, hopheux hongsaeh dajsan, dazyinx vunzmbanj cauxguh aen-

mbanj yienghmoq ciuhneix “Hong-saeh guh hung guh ak, yiengh mbanj gag miz daegsaek, aenmbanj seuqcingh gyaeundeiz, vunzmbanj vuenyungz doxhuz”, aeundaej cingzyauq yienhda. Youq Dading Cunh, gogaeu, go’em, mbawoj, faexcuk, naenggo’gyoij, ganj-haeuxyangz doengh go maj youq gwnz bya mbouj dij ngaenz haenx, ginggyaq fajfwngz soemgiuj vunzmbanj dajsan, baenz le batva, swxvenj, swxgaeu, haizdaz, gak cungj doenghduz, goenglaux swngdan doengh gij doxgaij gyaqciq haenx, canh ndaej hauilai ngaenz.

Daj bi 2012 gvaqdaeuj, Dading Cunh gonqlaeng roengzngaenz gyawj 2000 fanh maenz hwnjguh sezsih goekdaeuj, guhsat le roen heux mbanj, rog ciengz aenranz bae moq, douhung hauej mbanj, diuzmieng baiz raemx re raemxrongz, laeuzbanhgoeng cunhbu, cunghaep nyapnyaj cawqceq hanghmoeg, ranzlaeuz vujbauj, soengqraemx hanghmoeg, veiswnghsiz caeuq gaj raemx gaj diengzhaex doenghgij hongsaeh neix, henz dah henz roen, naj ranz laeng ranz, cungj ndaem gofaex gomak gova, ndaw mbanj cang miz daengroen, yawj bae seuqcingh moqsup, gyaeundeiz yinx vunz.



▲ Mehmbwk cingq cazyawj doxgaij dajsan bwh gai.



◀ Haeuj mbanj couh raen doxgaij dajsan dak rim dieg.

▲ Bya heu raemx saw heux aen mbanj.